

KA UI UITSHIMIKUT KAKUA

Etuat Rich

Ek^u pepamutet ne napeu. Tanua utauia kie ukauia, kie nenua unakanishkuema ne ishkuieu. Pepamutet napeu kie ne ishkuieu. Nikuteu ne uin ishkuieu.

Pemutenikueni kakua metitat, mishta-matshishkaminua. « Mishta-mishishtitshe ne kak^u », iteu. Metitat tapue, niate tshissekanu ekute etuteniti. Auennua nenua epiniti, kakua, mishta-mishishtinua ! Itiku niatikut :

— Ma tshika uitshimin ?

— Tanite ek^u tshipa tshi uitshimitin ? iteu. Tau ninapem.

Nipa tshi a tshi muau mishtik^u ? Ka-tshimuaua mishtik^u.

— Mauat, itiku, tshika uitshimin.

Ek^u iteu :

— Tshipa nipaik^u ninapem. Tanite tshipa ut tshi uitshimitin ?

— Apu tshika tshi nipait, itiku. Tshika nipaitin eka uitshimini. Kie apu tshika tshi natishk tshinapem, tshi uitshimitani.

Iteu ne napeiak^u :

— Ume tshe tutatan eka uitshimini, iteu.

Ekue natat nenua mishtikua, utamiatshitueu nenua mishtikua ekue kutauat niate, nasht tshikashkuieu nenua utikuna.

— Eukuan tshe tutuk tshinapem, kie tshin eukuan tshe tutatan eka uitshimini, itiku.

Ek^u kueshtatshimikut ne ishkieu. « Ek^u nipa nipaik^u at eka uitshimak », itenimeu. Enuet kanapua ekue aitit.

— Eshe, iteu, tshika uitshimitin ek^u enuet.

— Pitutshe, itiku (ekute anite etakuannit uatikunu).

Patutshet. « Ka-nipitutshenaua mitshuap... ! » ishinam^u. Ek^u nete tau kukuminash pitukamit mak ne tshisheiak^u. Ekue itishauat nete tauishkuat nenua unakanishkuema, ekute uatapimikut nenua napeua. Ekue unuit kau ne, ui kukushpinenitam^u tshetshi pitukuakanit ne napeiak^u. Anite ma utshipishkuamit ekute epit.

Tekushinit nana napeu :

— Tan nana eka taua ? iteu.

— Nikutepan nana, eshk^u apu takushinit, itiku.

Ekue tshitutet ne napeu. Uiapatanikueni kakua mishta-matshishkaminua. Ekue mamititat. Auennua nenua epiniti, kakua, mishta-mishishtinua ! Eukueka niate uet ituteniti nenua utishkuema. « Kanapua nipaletshe tshessinat, nipaletshe nana nitishkuema », itenimeu eshpishtiniti nenua kakua.

Tshieue, tshieue kau. Ekue utinat utatusha. Katshi utinat utatusha, ekue tshitutet. Niatat, kiatshimaiat nenua epiniti.

Uti pimitapini¹ ek^u pemitakuatat. Pitassiu ne, nenu ushui apashtau ne napeiak^u. Ekue kutauat nenua mishtikua tanite utatushinu anite tshikamunu uiat. Ek^u patutepaniut niate uatikut, uatikut niate pitutepaniu. Apu minekash shash mamatuetak. Apu minekash shash ut unuiu ne ishkieu.

¹ Uti pimitapini : mekuat e pimitapiniti.

— Tan etin anite ? itiku.

— Anite nipitukaik^u ne, iteu. « Tshika uitshimitin », nitik^u. Ek^u kueshtak. Nenua kutaueu mishtikua. « Eka uitshimini, tshe tutatan », nitik^u. Kutaueu nenua mishtikua. Ek^u kanapua kueshtak, enuet ekue uitsheuk. Anite patukait. Mishtaminuanu anite etaht, kie tshishennu anite iapit tau. Ek^u nipu nana shash, iteu.

Ek^u tshauetaikut kau unapema.

Eukuan eshkuaiatshimukushit.